



La generaziun giuvna manca dapertut

A las claustras da Mustér, Müstair, Cazas e Glion mancan las novizas ed ils novizs. Fertant che la situaziun a Mustér ed a Cazas è anc supportabla, nun han las cuminanze da las claustras da Glion e da Müstair naginas novizas ed ina auta vegliadetgna media en lur cuminanze. L'investgieu da Cuir ponderescha soluziuns pussaivlas.

MARTIN GABRIEL/FMR

«Nus avain decidì da restar qua», respunda la sora priura *Aloisia Steiner* da la claustra da Müstair a mia dumonda co ch'ellas planischiavan lur avegnir sco cuminanza benedictina. «Ma jau hai tutta chapientscha che la gliעד d'ordaifer la claustra dumonda co ch'i giaja vivnavant cun nus otg soras ch'essan anc qua.» Ellas hajan ina gronda confidenza en Dieu, di la priura sora *Aloisia Steiner*. Quella confidenza dettia la forza ad ellas da surviver sco cuminanza claustrala.

Strusch pli novizas u novizs

La davosa sora benedictina en la claustra da Müstair è entrada avant 15 onns. En la claustra dallas **dominicanas** a Glion èsi anc pli ditg dapi che la davosa noviza è entrada e restada. La claustra da Glion ha ina media da vegliadetgna da 84 onns ed il dumber da soras è sa reduci fitg entaifer ils davos 20 onns. La priura generala da la claustra da Glion, sora *Annemarie Müller* ha ditg dacurt a la FMR, (guarda LQ dals 7 da mars 2023), che las 77 soras dalla congregaziun dominicana da Glion hajan decidì d'elavurar ina strategia davart il futur da la communitad. «En paucs onns vegnin nus anc ad esser 50 soras u damain.» Las 45 soras **dominicanas** da la claustra da Cazas èn anc en ina situaziun pli favuraivla. Ins ha survegnì duas novizas giuvnas che sa preparan actualmain per l'empermischun u il profess perpeten. Sco quei che la priura *Brigitte Schönenberger* declera a la FMR, saja il regress da la religiusadad insumma in motiv che pli e pli paucas dunnas sa decidian d'entrar en ina claustra. «Ins po cumpa-

regliar quai cun las lètgs che vegnan serradas. I dat era pli paucas lètgs che vegnan serradas tenor la tradiziun cristiana oz. Ins sa decida da betg maridar, mabain da viver furmas alternativas. Il medem vala per la relaziun cun ina cuminanza claustrala.» Ma regress haja adina dà, di sora *Brigitte Schönenberger*. La priura da Cazas spera fitg ch'ils temps sa midian puspè en favur da las cuminanze claustralas.

Contacts cun ils giuvens èn impurtants

L'unica claustra da paders en il Grischun è quella dals benedictins a Mustér. Avat *Vigeli Monn* è dapi 11 onns avat da la claustra. El è actualmain er preses da tut las claustras da benedictins en Svizra e da duas claustras en il Tirolo dal Sid. En claustra da Mustér abiteschan 21 paders e fraters. Avat *Vigeli* di, che la tendenza en la claustra da Mustér saja bain era regressiva. Dentant hajan ils benedictins da Mustér adina puspè gi vocaziuns ils davos onns. Quai èn entradas da singuls umens ch'èn sa decidids per la vita claustrala. «Nus avain dus confrars ch'èn en il studi e nus avain uss dus novizs. La davosa messa nuviala en claustra avain nus gi l'onn 2018. La media da vegliadetgna è anc sut 60 onns.» La claustra da Mustér speria da survegnir ulteriuras entradas ils pro-

«Nus essan vidlonder da ponderar da metter ensemen singulas cuminanze che han ina spiritualitad



sumeglianta.»

Nicole Büchel,
 pledadra da l'uestgieu da Cuira

xims onns, di avat Vigeli. En scadin cas guardia el cun buna speranza vers l'avegnir. «Nus organisain qua tar nus occurrenz per la giuventetgna e vegnin uschia en contact cun ils giuvens.» Ed ils confrars giuvens sajan er adina preschents a las occurrenz da la giuventetgna catolica. Avat Vigeli: «Nus essan per exempel da la partida al Di mundial da giuventetgna ni era als Dis internaziunals da la giuventetgna che han lieu la stad 2023 en il Portugal. En quels lieus datti adina novs contacts.»

Novas furmas da communitad

En il Grischun èn las claustras da las mungias pli pertutgadas da la mancanza da successuras che la claustra da muntgs a Mustér. Er tar l'uestgieu da Cuira èn ins conscient dal problem. La pledadra da l'uestgieu *Nicole Büchel* ha ditg, che l'uestg *Joseph Maria Bonnemain* observeschia cun gronda empatia il svilup da las claustras grischunas. Ed igl uestg vules sustegnair las claustras cun tschertgar soluziuns. Nicole Büchel: «Nus essan vidlonder da ponderar da metter ensemen singulas cuminanze che han ina spiritualitad sumeglianta. I fess gia in grond pass sch'ins pudess collavurar sin il sector administrativ tranter las claustras. Las singulas cuminanze ston dentant pudair salvar lur independenza e viver quella a moda e maniera autonoma.» Tenor la pledadra da l'uestgieu dettia a Sarnen en Sutsilvania in Center claustral nua che trais cuminanze claustrals vivian sut in tetg. E quai funcziuneschia bain, di Nicole Büchel.



Las otg soras benedictinas da Müstair han decidi da na betg bandunar lur claustra. FOTO NADJA SIMMEN

Chaputschins dad Olten bandunan lur claustra

Auter ch'en il Grischun datti en la Svizra bassa er claustras sco quella dals paders chaputschins ad Olten che bandunan lur claustra da Pastgas 2024. En la claustra amez la citad dad Olten ch'è vegnida fundada l'onn 1646 vivan oz anc otg fraters. La media da vegliadetgna dals otg frars è 84 onns. Quai ha frater *Josef Bründler*, il manader da la cuminanza claustrala dad Olten, declarà dacurt en ina emisiun da SRF. Il commember il pli giuven haja 78 onns e la generaziun giuvna manchia. En Svizra datti sper Olten anc tschintg autras claustras da chaputschins. Frater Josef Bründler ha ditg, che cura ch'el saja entrà en l'urden l'onn 1966, aveva l'urden entir 800 frars chaputschins svizzers. Oz sajan quai anc 90. Fin uss n'èsi betg enonuschent nua ch'ils otg fraters chaputschins dad Olten van ad abitar suenter Pastgas 2024. I na dat er anc nagins plans per l'utilisaziun futura da la claustra dad Olten. (fmr/mg)